

REGIONAL NEWS UNIT
ALL INDIA RADIO, AGARTALA
Date: 25-05-2024
Time: 07:55-08:05 PM Hrs
BENGALI EVENING BULLETIN

Headlines :

- (১) ১২৫তম নজরুল জন্মজয়ন্তী উপলক্ষ্যে আজ রাজ্যে জুড়ে নানা অনুষ্ঠানের আয়োজন করা হয় ।
- (২) অষ্টাদশ লোকসভা নির্বাচনের ষষ্ঠ পর্বের ভোটগ্রহণ সম্পন্ন ।
- (৩) ঘূর্ণিঝড় রেমালের পরিপ্রেক্ষিতে ভারতীয় আবহাওয়া দপ্তরের পক্ষ থেকে রাজ্য সরকারের কাছে সতর্কবার্তা পাঠানো হয়েছে ।
- (৪) প্রথম ডিভিশন ক্রিকেটের সুপার ফোরের দুটি ম্যাচ আজ শুরু হয়েছে ।

Najrul Jayanti-Dhalai :

১২৫তম নজরুল জন্মজয়ন্তী আজ সারা রাজ্যে যথাযথ মর্যাদায় উদযাপন করা হয়। বিদ্যালয় শিক্ষা দপ্তরের উদ্যোগে রাজ্যভিত্তিক নজরুল জন্মজয়ন্তী উদযাপন করা হয় আমবাসা টাউন হলে। অনুষ্ঠানের উদ্বোধন করেন ধলাই জেলার জেলাশাসক সাজু ওয়াহিদ এ। অনুষ্ঠানে পৌরহিত্য করেন শিক্ষা অধিকর্তা এন সি

শর্মা। অনুষ্ঠানে অন্যান্য অতিথিদের মধ্যে উপস্থিত ছিলেন আগরতলা সরকারি সংগীত মহাবিদ্যালয় এর অধ্যক্ষা মনিকা দাস, ধলাই জেলার অতিরিক্ত পুলিশ সুপার মানবেন্দ্র চৌধুরী, জেলা শিক্ষা আধিকারিক যতন কুমার দেববর্মা ও জেলা তথ্য ও সংস্কৃতি দপ্তরের সহ-অধিকর্তা চন্দন সরকার প্রমুখ।

NajrulJayanti-CM :

মুখ্যমন্ত্রী অধ্যাপক ডা: মানিক সাহা আজ যোগেন্দ্রনগরের রেন্টার্স কলোনীতে বিদ্রোহী কবি কাজী নজরুল ইসলামের পূর্ণাবয়ব মূর্তির আবরণ উন্মোচন করেন। ভারত-বাংলা মৈত্রী সংসদ আয়োজিত এই অনুষ্ঠানে মুখ্যমন্ত্রী বলেন, বিদ্রোহী কবি কাজী নজরুল ইসলামের চিন্তাভাবনা বর্তমান সময়েও প্রাসঙ্গিক। তিনি মানবিকতার যে জয়গান গেয়েছেন তা বর্তমান প্রজন্মের সামনে তুলে ধরার প্রয়োজন রয়েছে। নজরুলের জীবন ও সাহিত্য নতুন প্রজন্মের কাছে আরও বেশি করে তুলে ধরতে হবে। অনুষ্ঠানে এছাড়াও উপস্থিত ছিলেন পর্যটনমন্ত্রী সুশান্ত চৌধুরী, আগরতলা পুরনিগমের মেয়র দীপক মজুমদার, রাজ্যের অ্যাডভোকেট জেনারেল সিদ্ধার্থ শংকর দে প্রমুখ।

Election 6th phase :

অষ্টাদশ লোকসভা নির্বাচনের ষষ্ঠ পর্বের ভোটগ্রহণ আজ শেষ হয়েছে। এই পর্যায়ে ছয়টি রাজ্য ও দুটি কেন্দ্রশাসিত অঞ্চলের মোট ৫৮টি সংসদীয় আসনে ভোট নেয়া হয়। এর মধ্যে রয়েছে উত্তরপ্রদেশের ১৪টি, হরিয়ানার ১০টি, বিহার এবং পশ্চিমবঙ্গের ৮টি

করে, দিল্লির ৭টি আসন, ওড়িশার ৬টি, ঝাড়খণ্ডের চারটি এবং জম্মু ও কাশ্মীরের একটি আসন রয়েছে। সকাল ৭টায় ভোটগ্রহণ শুরু হয়ে শেষ হয় সন্ধ্যা ৬টায়। বিকেল ৫টা পর্যন্ত পশ্চিমবঙ্গে পড়েছে ৭৮ শতাংশ, ঝাড়খণ্ডে ৬১ শতাংশের বেশি, উড়িষ্যা ৫৯ শতাংশের বেশি, হরিয়ানা ৫৬ শতাংশ, দিল্লিতে প্রায় ৫৪ শতাংশ, উত্তরপ্রদেশ শতাংশের বেশি, বিহারে ৫২ শতাংশ, জম্মু ও কাশ্মীরে ৫১ শতাংশ ভোট পড়েছে।

এই পর্বে মোট ৮৮৯ জন প্রার্থী রয়েছেন। যে বিশিষ্ট প্রার্থীদের ভাগ্য আজ ইভিএম বন্দী হয়েছে, তাদের মধ্যে রয়েছেন, বরিষ্ঠ বিজেপি নেতা ধর্মেন্দ্র প্রধান, মানেকা গান্ধী, মনোহর লাল খট্টর, মনোজ তিওয়ারি, কংগ্রেস নেতা দীপেন্দ্র সিং হুডা, কুমারী শৈলজা, রাজ বব্বর এবং কানহাইয়া কুমার, সমাজবাদী পার্টির নেতা ধর্মেন্দ্র যাদব এবং পিডিপি প্রধান মেহবুবা মুফতি। এই পর্বে ১ লক্ষ ১৪ হাজার ভোটকেন্দ্রে ভোট নেয়া হয়। এই পর্বে ১১ কোটিরও বেশি ভোটার ছিলেন। নির্বিঘ্নে ভোটগ্রহণ নিশ্চিত করতে নির্বাচন কমিশন এই পর্বেও ব্যাপক ব্যবস্থা গ্রহণ করে।

আজ একই সঙ্গে তৃতীয় দফায় ওড়িশা বিধানসভার ৪২টি আসনের জন্য ভোটগ্রহণ করা হয়। এছাড়াও, হরিয়ানার কার্নাল এবং উত্তর প্রদেশের গাইনসারি আসনের বিধানসভার উপনির্বাচনও আজ অনুষ্ঠিত হয়।

Vote-President :

রাষ্ট্রপতি দ্রৌপদী মুর্মু এবং উপরাষ্ট্রপতি জগদীপ ধনখর, দিল্লির মুখ্যমন্ত্রী অরবিন্দ কেজরিওয়াল ভোট শুরু হওয়ার প্রথম এক ঘণ্টার মধ্যে ভোট দিয়েছেন। ভোট দেওয়ার পর উপরাষ্ট্রপতি

বলেন, ভোটদান দায়িত্বের পাশাপাশি একটি শক্তিও। ভারতেই রয়েছে বিশ্বের সবচাইতে প্রানবন্ত, সক্রিয় এবং কার্যকর গনতন্ত্র।

বরিষ্ঠ কংগ্রেস নেতা সোনিয়া গান্ধী, রাহুল গান্ধী, প্রিয়াঙ্কা গান্ধী, কেন্দ্রীয় মন্ত্রী ডঃ এস জয়শঙ্কর এবং হরদীপ পুরি এবং মুখ্য নির্বাচন কমিশনার রাজীব কুমারও দিল্লির বিভিন্ন ভোটকেন্দ্রে আজ তাদের ভোটাধিকার প্রয়োগ করেছেন। এছাড়া স্বরাষ্ট্রসচিব অজয় ভাল্লা, সিপিআইএম নেতা বৃন্দা কারাত, বিজেপি প্রার্থী মনোজ তিওয়ারি এবং কংগ্রেস প্রার্থী উদিত রাজও আজ ভোট দিয়েছেন।

Nazrul Jayanti-KAILASHAHAR :

ঊনকোটি জেলা সদর কৈলাশহরেও আজ নজরুল জন্মজয়ন্তী পালন করা হয়। এই উপলক্ষে বিদ্যালয় শিক্ষা ও তথ্য-সংস্কৃতি দপ্তরের উদ্যোগে কৈলাশহরের ঊনকোটি কলাক্ষেত্র প্রাঙ্গনে এক বর্ণময় অনুষ্ঠানের আয়োজন করা হয়। অনুষ্ঠানের শুরুতে বিদ্রোহী কবির মর্মর মূর্তিতে মাল্যদান ও পুষ্পার্ঘ্য অর্পণ করে শ্রদ্ধা নিবেদন করা হয়। অনুষ্ঠানের উদ্বোধন করেন, কৈলাশহরের অতিরিক্ত মহকুমা শাসক নবকুমার জমাতিয়া। উপস্থিত ছিলেন তথ্য-সংস্কৃতি দপ্তরের সহ-অধিকর্তা বিশ্বজিৎ দেব, বিদ্যালয় পরিদর্শক বেনীমাধব চক্রবর্তী প্রমুখ।

Nazrul jayanti-Baikhora :

আন্তর্জাতিক বাংলা ভাষা-সংস্কৃতি সমিতির শান্তিরবাজার শাখার উদ্যোগে এবং জগন্নাথ ওয়েলফেয়ার সোসাইটি ও আর্ট চিত্রার ব্যবস্থাপনায় বাইখোড়া জগন্নাথবাড়িতে কবি প্রণাম অনুষ্ঠিত হয়।

অনুষ্ঠানে বাইখোড়া ইসকনের প্রধান পরিচালক করুণেশ্বর মাধব দাস, আন্তর্জাতিক বাংলা ভাষা-সংস্কৃতি সমিতির শান্তিরবাজার শাখা সম্পাদক বিদ্যুৎ দেবনাথ প্রমুখ উপস্থিত ছিলেন। নজরুলের গানে নৃত্যে জন্মদিনে কবির প্রতি শ্রদ্ধাঞ্জলি অর্পন করেন স্থানীয় শিল্পীরা।

Nazrul Jayanti :

নজরুল জয়ন্তী উপলক্ষ্যে আজ সকালে আগরতলার নজরুল কলাক্ষেত্র প্রাঙ্গণে অনুষ্ঠিত হয় কবি প্রণাম। অনুষ্ঠানে কবির প্রতিকৃতিতে শ্রদ্ধার্ঘ্য নিবেদন করেন তথ্য সংস্কৃতি দপ্তরের সচিব পি কে চক্রবর্তী, দপ্তরের যুগ্ম সচিব অনুপম চক্রবর্তী ও সঞ্জীব চাকমা। বিভিন্ন সাংস্কৃতিক দল এই অনুষ্ঠানে এখানে নজরুল সঙ্গীত নৃত্য পরিবেশন করে।

Nazrul Jayanti-Sepahijala :

বিশালগড় মহকুমা তথ্য সংস্কৃতি দপ্তর ও ভারতরত্ন অটলবিহারী বাজপেয়ী দ্বাদশ শ্রেণী বিদ্যালয়ের উদ্যোগে আজ চড়িলামের কমিউনিটি হলে নজরুল জন্মজয়ন্তী উদযাপন করা হয়। অনুষ্ঠানের উদ্বোধন করেন চড়িলাম ব্লকের বি.ডি.ও রুপন দাস। উপস্থিত ছিলেন বিশালগড় মহকুমা তথ্য আধিকারিক কাকলি ভৌমিক, অটলবিহারী বাজপেয়ী দ্বাদশ শ্রেণী বিদ্যালয়ের প্রধান শিক্ষক মনিময় ভৌমিক প্রমুখ। তারা নজরুল ইসলামের জীবনাদর্শ নিয়ে আলোচনা করেন। সোনামুড়া মহকুমা তথ্য ও

সংস্কৃতি দপ্তরের উদ্যোগে আজ সোনামুড়া টাউন হল প্রাঙ্গনেও নজরুল জয়ন্তী পালন করা হয়।

Update Akashvani :

শ্রোতাবন্ধুরা, আকাশবাণীর সংবাদ সহ বিবিধ খবরের বিস্তৃত আপডেট পেতে লগ ইন করুন - ডব্লিউ, ডব্লিউ, ডব্লিউ ডট, নিউজ অন এআইআর ডট কম এবং নিউজ অন এআইআর অ্যাপ, এবং টুইটার অর্থাৎ এক্স প্ল্যাটফর্মে। আপডেট পেতে দেখুন আকাশবাণী নিউজ আগরতলা / ফেসবুকে এআইআর নিউজ আগরতলা এবং ইউ টিউবে এআইআর নিউজ আগরতলা।

Felicitation :

মুখ্যমন্ত্রী অধ্যাপক ডা: মানিক সাহা আজ আগরতলায় ত্রিপুরা মধ্যশিক্ষা পর্ষদ পরিচালিত মাধ্যমিক ও উচ্চ মাধ্যমিক পরীক্ষায় কৃতিদের সংবর্ধনা প্রদান করেন। মুখ্যমন্ত্রী কৃতি ছাত্রছাত্রীদের সবার উজ্জ্বল ভবিষ্যত কামনা করেন। তাছাড়া বিভিন্ন সংগঠনের পক্ষ থেকেও কৃতিদের সংবর্ধনা প্রদান করা হয়।

বিশালগড় বিবেকানন্দ শিশু নিকেতন থেকে মাধ্যমিক পরীক্ষায় কৃতি ছাত্র রাম জয় সাহা ও সৌম্যদ্বীপ ভৌমিককে সংবর্ধনা জ্ঞাপন করেন TIDC চেয়ারম্যান নবাদল বনিক ও স্কুলের এস.এম.সি কমিটির সদস্যগণ। তাছাড়া SFI বিশালগড় মহকুমা কমিটির পক্ষ থেকেও আজ এই দুই কৃতি ছাত্রকে সংবর্ধনা জ্ঞাপন করা হয়।

মাধ্যমিকে কৃতি ছাত্রী পূর্বা বিশ্বাসকে সম্বর্ধনা জানিয়েছেন প্রদেশ
বিজেপি সভাপতি রাজীব ভট্টাচার্য।

Bar enrollment :

আজ ত্রিপুরা হাইকোর্ট চত্বরে আয়োজিত এক অনুষ্ঠানে ১৫১ জন
আইনজীবীকে এনরোলমেন্ট সার্টিফিকেট প্রদান করা হয়।
হাইকোর্ট বার কাউন্সিলের চেয়ারম্যান রতন দত্ত এখবর
জানিয়েছেন।

Current Affairs :

আগামী পয়লা জুলাই থেকে দেশে চালু হতে যাচ্ছে ভারতীয় ন্যায়
সংহিতা ২০২৩, ভারতীয় নাগরিক সুরক্ষা সংহিতা ২০২৩ এবং
ভারতীয় সাক্ষ্য অধিনিয়ন ২০২৩ আইন। আজ আকাশবাণী
আগরতলার সংবাদ বিভাগের সাপ্তাহিক আলোচনায় অংশ নিয়ে
রাজ্যের এডভোকেট জেনারেল সিদ্ধার্থ শংকর দে বলেন নতুন
এই আইনগুলি ভারতীয় সমাজ ব্যবস্থার প্রতি নজর রেখে তৈরি
করা হয়েছে। প্রায়শই বিচারব্যবস্থায় যে প্রতিবন্ধকতার সৃষ্টি হতো
তা লাঘব হবে নতুন আইনের মাধ্যমে। বিচার ব্যবস্থা, এমনকি
পুলিশ প্রশাসনের উপরেও মানুষের আস্থা বাড়বে। তিনি বলেন,
নতুন এই আইনগুলির মাধ্যমে তদন্ত থেকে বিচার বিভাগীয়
প্রক্রিয়ায় নির্দিষ্ট সময়ের মধ্যেই শেষ করা হবে বিচার কাজ।
এমনকি দেশের যে কোন প্রান্ত থেকে জনগণ তাদের অভিযোগ
ইমেল বা whatsapp এর মাধ্যমে জানাতে পারবেন। তিনি বলেন

যান দুর্ঘটনায় যে বিরোধ দেখা দিত সেই বিরোধগুলিও দূর হবে নতুন আইনে।

AIDSO :

এ আই ডি এস ও, এ আই ডি ওয়াই ও, এ আই এম এস এস-এর যৌথ উদ্যোগে আজ নজরুল জয়ন্তী উদযাপন করা হয়। আগরতলাস্থিত পোস্ট অফিস চৌমুহনীতে আয়োজিত এক অনুষ্ঠানে নজরুলের প্রতিকৃতিতে পুষ্পার্ঘ্য অর্পণ করে শ্রদ্ধা জানানো হয়। শ্রদ্ধা নিবেদন করেন এ আই এম এস এস-এর রাজ্য সভানেত্রী শিবানী দাস, এ আই ডি ওয়াই ও-এর রাজ্য সভাপতি ভবতোষ দে, এ আই ডি এস ও-এর রাজ্য সভাপতি মৃদুল কান্তি সরকার প্রমুখ।

Super Four Cricket :

প্রথম ডিভিশন ক্রিকেটের সুপার ফোরের দুটি ম্যাচ আজ শুরু হয়েছে। নরসিংগড় টি আই টি মাঠে হার্ভে ক্লাবের বিরুদ্ধে দুদিনের ম্যাচে প্রথমে ব্যাট করতে নেমে চলমান সংঘ প্রথম ইনিংসে সবকটি উইকেট হারিয়ে ২৪৭ রান করে। জবাবে হার্ভে ক্লাব প্রথম ইনিংসে প্রথম দিনের শেষে ৫ উইকেট হারিয়ে ৪১ রান করে। এদিকে পুলিশ ট্রেনিং একাডেমি মাঠে পোলস্টার ক্লাবের বিরুদ্ধে দুদিনের ম্যাচে কসমোপলিটন ক্লাব প্রথমে ব্যাট করতে নেমে প্রথম ইনিংসে সবকটি উইকেট হারিয়ে ২০৩ রান করে। জবাবে পোলস্টার ক্লাবের প্রথম ইনিংসে দিনের শেষে ৪ উইকেট হারিয়ে ৭৭ রান সংগ্রহ করে।

Senior Cricket-Santirbazar :

শান্তিরবাজার ক্রিকেট এসোসিয়েশন আয়োজিত মহকুমা সিনিয়র ক্রিকেট টুর্নামেন্ট চ্যালেঞ্জার ট্রফির আজকের ম্যাচে চুংকু থাংগা ক্লাব ৫ উইকেটে অংকুর ইউনিটকে পরাজিত করেছে। বাইখোড়া মাঠে টসে জিতে প্রথমে ব্যাট করতে নেমে অংকুর ইউনিট ৩০ ওভার ৫ বলে সব উইকেট হারিয়ে ১২৮ রান সংগ্রহ করে। জবাবে খেলতে নেমে বিজয়ী দল চুংকু থাংগা ক্লাব ১৬ ওভার ৪ বলে ৫ উইকেট হারিয়ে জয়ের প্রয়োজনীয় রান রান তুলে নেয়।

Weather :

ঘূর্ণিঝড় রেমালের পরিপ্রেক্ষিতে ভারতীয় আবহাওয়া দপ্তরের পক্ষ থেকে আজ রাজ্য সরকারের কাছে সতর্কবার্তা পাঠানো হয়েছে। এই পরিপ্রেক্ষিতে রাজ্যের মুখ্য সচিব জে কে সিনহা সম্ভাব্য প্রাকৃতিক দুর্যোগ মোকাবেলায় প্রয়োজনীয় সবধরনের ব্যবস্থা গ্রহণের জন্য জেলা শাসকদের নির্দেশ দিয়েছেন। ভারতীয় আবহাওয়া দফতর জানিয়েছে, পূর্ব-মধ্য বঙ্গোপসাগরের উপর "গভীর নিম্নচাপ" আজ রাতের মধ্যেই ঘূর্ণিঝড়ে পরিণত হওয়ার সম্ভাবনা রয়েছে। এরপর এটি অতি প্রবল ঘূর্ণিঝড় রেমালে পরিণত হয়ে আগামীকাল মধ্যরাতে বাংলাদেশের খেপুপাড়া ও পশ্চিমবঙ্গ উপকূলের সাগরদ্বীপ অঞ্চলে আছড়ে পড়তে পারে। ঘূর্ণিঝড় রেমালের প্রভাবে রাজ্যেরও সবকয়টি জেলায় ঝড় ও অতি ভারী বৃষ্টির সতর্কতা জারি করা হয়েছে। এই ঘূর্ণিঝড়ের সর্বোচ্চ

গতিবেগ হতে পারে ঘন্টায় ১২০ কিলোমিটার। এই সময়ে রাজ্যে ঝড়ো হওয়ার গতিবেগ হতে পারে ঘন্টায় ৪০ কিলোমিটার থেকে সর্বোচ্চ ৭০ কিলোমিটার। রেমালের উত্তর ওড়িশার উপকূলীয় এলাকায় বিচ্ছিন্নভাবে ভারী বৃষ্টিপাত হতে পারে। উত্তর-পূর্বাঞ্চলের অন্যান্য রাজ্যেগুলিতেও ঝড়ো হওয়া ও অতি ভারী বৃষ্টিপাতের সতর্কতাও জারি করা হয়েছে।

ঘূর্ণিঝড়ের ফলে সম্ভাব্য ক্ষতির মোকাবেলায় জাতীয় বিপর্যয় মোকাবিলা বাহিনী ১২টি দল মোতায়েন করেছে এবং ৫টি অতিরিক্ত দলকে তৈরি রাখা হয়েছে। সেনাবাহিনী, নৌবাহিনী, উপকূলরক্ষী বাহিনী সহ জাহাজ ও বিমান প্রস্তুত রাখা হয়েছে। বিদ্যুৎ মন্ত্রক থেকেও জরুরি দল মোতায়েন করা হয়েছে।
